

Gaeqmeh miz song dahlwg, boux hung heuh dahcej, boux iq heuh dahnuengx.

Miz ngoenz ndeu, dahnuengx fatbingh, youqgaenj raixcaix. Daxmeh gip dwk lae raemxda. Dahcej buet daengz gyanghongh, gvih roengzdaeuj, song fwngz doxgoeb youq najaek, lwgda yawj hwnj gwnzmbwn bae, gag nam gag gangj: “Mbwn daxgoeng, cingj mwngz guh saeh ndei, gouqgouq dahnuengx gou ba!”

Seizneix, duz manaez cingq youq rog dou gvaengz bae gvaengz dauq, ndawsim cingq siengj baenzlawz cij ndaej gwn gaeqlwg. Dang de dingqnyi gaeq dahnuengx fatbingh seiz, ndawsim angq dangqmaz, gihvei dauj lo, cien bi bungz mbat ndeu a! Manaez ganjvaiq ma ranz, daiq hwnj fouq gingqda ndeu, daenj geu buh hau ndeu, cang guh boux canghyw.

Manaez angqvauvau riuq aen loengx iq he, lumj mbin nei yiengq ranz gaeqmeh buet bae. De siengj daengz caj yaep ndeu couh ndaej gwn nohgaeq lo, ngah dwk myaiz rihnanngang bae. Dauj daengz ranz duzgaeq lo, manaez menhmenh roq dou, unqswnh naeuz: “Gaeqmeh daxsimj, dingqnaeuz lwg mwngz fatbingh lo, gou dwg canghyw, rox yw haujai

Goj Gaeqmeh Caeuq Manaez

母鸡和狼的故事

□ Banh Vwnzcingh / 潘文清

cungj bingh, hawj gou haeujbae yw lwg mwngz ba.”

Dahcej baez dingqnyi miz canghyw dauj lo, sikhaek buet okbae hai dou, gig roxsoq dwk naeuz: “Canghyw, mwngz dauj ndaej caen doiqseiz, docih mwngz, cingj haeuj-daeuj!” Manaez riunyumj naeuz: “Gaej yungh guhhek lai.” Doq gangj doq yamq hung dwk byaij haeuj ndaw ranz bae. De goq mbouj ndaej caeuq gaeqmeh gangjvah, cig byaij haeuj ndaw rug, daengz henz congz dahnuengx ninz, gyajcang yawj gij bingh dahnuengx.

Seizneix gaeqmeh raen boux hek neix mbouj cingj gag dauj, ndawsim miz di ngeiz, de gaen youq baihlaeng sijsaeq yawj boux canghyw neix. Dai lo, mbouj yawj mbouj rox, mbat yawj doeksat liux. De yawjraen diuz rieng youh bwnnyum youh raez ndeu,

ndawsim sikhaek mingzbeq lo.

Manaez genjcaz liux, cienq ndang doiq gaeqmeh naeuz: “Daxsimj, gij bingh lwg mwngz youqgaenj bw, danghnaeuz mbouj vaiq di yw ngaiz dai bw.” Gaeqmeh daegdingq simvueng dwk naeuz: “Yiengh ma, hoeng mbouj yungh gip, mwngz ganjroen dwgrengz lo, ok rog ding bae gwn cenj caz gonq caiq yw.” Manaez gaen gaeqmeh daj ndaw rug okdaeuj, gaeqmeh ndenq aen daengq hawj de naengh. Manaez gyawz gamj naengh, aenvih diuz rieng de youh bwnnyum youh raez, baez naengh roengzbae couh conh okdaeuj, yienghneix gaeqmeh baez fatyienh giva couh satsoq lo. Gaeqmeh raix cenj caz ndenq hawj manaez, naeuz: “Cingj mwngz naengh roengzdaeuj menhmenh gwn caz deq gou, gou bae ndaw ranzdajcawj aeu noh okdaeuj hawj

mwngz.” Manaez naeuz: “Gou mbouj naengh, ndwn gwn ndaej lo.” De itmienh gwn caz itmienh siengj: Mbouj loek, lij miz noh gwn, gwn noh sat le caiq gwn gaeqmeh caeuq song boux lwg de. Siengj sat gag laeglemx riu hwnjdaeuj.

Gaeqmeh daj ndaw ranzdajcawj dawz deb noh homfwtfwt ndeu okdaeuj lo, de caemdingh dwk doiq manaez naeuz: “Canghyw, mwngz sinhoj lo, dauj, gwn imq le caiq yw lwg gou.” Gaeqmeh ngamq cuengq aen deb, manaez couh vax gaiq noh oet haeuj bak bae, ngamq geij gaemz couh gwn liux lo. Gaeqmeh ndwn youq gizhaenx mbouj doengh, song da cimyawj manaez. Ngamq gvaq yaep he, manaez hemq dungxin hwnjdaeuj, youq gwnznamh rouxringx geij mbat. De caengzyawj gaeqmeh, siengj aj bak gangjvah. Hoeng lij caengz gangj, bak couh conh ok fugfauz hau, seiq ga baez iet, gatheiq lo.

Gaeqmeh baez duet geu buh gwnz ndang manaez, duz manaez yakrwix he couh loh okdaeuj lo. Dahcej yawj dwk bak ajloengloeng. Daxmeh doiq de naeuz: “Lwg a, aen sim fuengz vunz mbouj ndaej mbouj miz, hix mbouj ndaej seizbienh saenq vunz.”

Song Aen Makbug

两个柚子

□ Hoz Cunghliuj / 何宗柳

Diuz gai baihsae miz ranz he cungj miz 4 boux vunz, gvanbaz, daeglwg ndeu miz 3 bi caeuq daxdaiq. Ranz neix gvan heuhguh Daegliengh, bouxvunz sanghung, dang ganbu. Yah de baeznaengz guh vunz guh saeh ged lai, ndigah vunzwnq heuh yah de guh “Yahged”. Yahged bae gwnz haw gai mak. Daegliengh ciengz doiq yah de naeuz: “Gaej nyen lai, daeng gwn couh gwn, daeng yungh couh yungh.” Yah de naeuz: “Mbouj laemz baenzlawz rom ndaej cienz lai?”

Liggaeuq bet nyied cibngux lajbyonghngoenz, Yahged cij bae rag cisamloek makbug ndeu hwnj haw bae gai. Seiz ok dou, daeglwg doiq de naeuz: “Daxmeh ndeigai! Geiq ce song aen makbug dauq hawj gou bw.” “Baujboiq daxmeh a, gou geiq lo. Mbouj dwg daxmeh ndeigai, dwg makbug ndeigai.” Daxboh daxdaiq dingq le, riuhehe hwnjdaeuj.

Gvaiq la, mbouj rox maz yenzynh, bineix makbug gig ndei gai, youh ndaej gyaqcienz. Bingzciengz moix gaen 1.3 maenz daengz 1.5 maenz, bineix 2 maenz daengz 3 maenz gaen he. Ci makbug ndeu hwnj haw, ngamq 2 diemj cung, Yahged couh gai liux lo. Seizhaenx, miz daegcoz he dauj cam de: “Gou cawx song aen makbug.” “Doiq mbouj hwnj, mbouj miz gai lo, gizwnq bae cawx ba.” “Gizwnq hix mbouj miz gai lo, gou yawjraen ndaw swx mwngz lij miz song aen, cingj gai hawj gou, gou hawj mwngz gaen 3 maenz.” “Neix dwg gou ce hawj lwg gou, gaen 5 maenz hix mbouj gai.” “Mehliuz, gouz mwngz gai

hawj gou, gou gaenq dapwngq cawx song aen makbug hawj daxdaiq gou. Mwngz caiq bae bued ci mak ndeu dauj, itdingh lij gai ndaej sat. Neix gou hawj mwngz aen he 30 maenz ndaej loba.” “Yo, daegnuengx, gou gai mak baenzlai bi lo, boux dauj cawx cungj naeuz cawx mak baema hawj lwgnyez, caengz nyi byawz naeuz cawx hawj bouxlaux gvaq. Sim hauqswnh mwngz gig ndei. Gou gai hawj mwngz.”

Daegcoz haenx dawz mak deuz lo, Yahged gag naeuz: “Aen mak he couh canh 20 lai maenz, guh ndaej gvaq bw.” Gangj sat, de couh rag ci youh bae bued moq.

Banhaemh, caezgya naengh youq gyanghongh gangj gojgaeq. Yaep he, Ronghndwen swng hwnjdaeuj lo, daeglwg Yahged dauq ranz siengj dawz bingj, makbug okdaeuj caeq ronghndwen. De cam daxmeh: “Makbug gou youq gyawz?” “Yo, gou gaenq gai bae lo, dauq bae bued, gizde hix mbouj miz gai lo. Gou con geij diuz gai hix cawx mbouj ndaej. Baujboiq, ngoenzcog gou aeu daeh makbug ndeu dauq hawj mwngz.” “Ha……gou aeu makbug……” Daeglwg sikhaek youq gwnznamh rouxringx daej hwnjdaeuj. Daegliengh ndaq yah de: “Caen dwg lwg ndaej meh, meh ndaej daiq, gofaiq ndaej goraeu bw. Gai byaek lienz gij byaek daiq maij gwn hix mbouj miz gwn. Seizneix haeb cienz gwn vei. Daeg iq, gaej daej, daxboh bae ranznden aeu bingj vuenh makbug dauq hawj mwngz.” Gangj sat, de sikhaek bae bongx dou ranznden. De laebdaeb cam



Diuz rij ndaw ndoengfaex laefagfag

doh diuz gai, gyoengqde cungj dwg bouxlaux youq ranz, cij cawx bingj mbouj cawx makbug. Daegliengh hoz gig ndat dauqma ranz, raen daeglwg lij ninz gwnznamh daejcupcup. De youh ndaq yah de geij coenz, yah de hix daej lo, daxdaiq hix gaen daej hwnjdaeuj. Sam mehlwg lumj ciengqheiq nei daejsiebsieb.

Seizde, miz aen ciq ndeu hai gvaqdaeuj daengx roengzdaeuj, daj gwnz ci byaij roengz daegcoz he, de couhdwg aeu 60 maenz caeuq Yahged cawx song aen makbug haenx. Daxbuz ranznden dwg daxdaiq de, de yinh doxgaiq dauq caeuq daxdaiq de gvaq ciet. De raen 3 mehlwg neix daej, cam rox cingzgvang le couh dawz song aen makbug dauj hawj daeg iq. Daeg iq

sikhaek caem roengzdaeuj. Yahged doq uet raemxda doq mbon cienz okdaeuj, naeuz: “Caen doiq mbouj hwnj, gou doiq 50 maenz hawj mwngz.” “Gou mbouj aeu. Gaicawx swyouz, nyienh cawx nyienh gai. Byawz rox yah gou hix cawx ndaej makbug gvaq. Neix dwg gou soengq hawj lwg mwngz. Daxdaiq lij miz song aen dem.” Daegliengh gig vaiq dauq ranz dawz song bau bingj okdaeuj, ndaw bau bingj he miz 100 maenz, de ndenq hawj daxdaiq daegcoz haenx, naeuz: “Gou aeu song aen bingj vuenh song aen makbug.” Daxdaiq cieq dwk riu naeuz: “Ndei, docih mwngz.”

Seizde, ronghndwen ronghsaksak saj youq gwnzdieg, cibfaen gyaendei, caen maez vunz.